

Die Heilung eines Gelähmten

Jesus zog im Land umher
mit seine Jünger, kreiz und quer.
Hat hie und do Station gemach.
So kam er aa no Mackebach.

Die Nachricht wurd schnell weitergebb
von Mund zu Mund und als WhatsApp:
Heit Obend gäbt's „Jesus total“
ab halwer acht in Kaisers Saal!

Schunn mittags sinn die erschte kumm
un hann die beschte Plätz genumm
un fer die Sipperschaft reserveert.
Das wär normal do, wie mer heert.

Um halwer acht war dann der Saal
gerammelt voll, wie frihr als mal,
wo beispielsweise an Fassenacht
beim Tanze hat de Borm gekracht.

De Jesus is schunn startbereit
und sat: „Ich grüß euch, liewe Leit,
's is schää bei eich in Mackenbach!“
Doch plötzlich gäbt's im Hof drauß Krach.

Auf einer Trage woll'n vier Mann
e fünfter, wo net laafe kann,
zum Jesus in de Saal ruffschlääfe
fer ne zu hääle und zu dääfe.

Der Mann, wo uff de Trage leit,
war emol, vor langer Zeit,
me'm Esel in die Stadt geritt
un hat sich mit dem Vieh gestritt.

Das hat ne äfach abgeschmiss
un hat gespautzt un hat gebiss
un so getret den brave Mann,
dass der nimmi laafe kann.



Jetzt denne hoch zum Jesus bringe,
wollt de Träger net gelinge.
Die Trepp war vun de Leit blockiert.
Do sinn die Männer ungeniert
am Baugerüst, wo do gestann,
weil se nei gestrich dort hann,
uff Kaisers Dach enuffgekrabbelt,
und glei druff hat's dort laut
gerabbelt.

E Loch im Dach, zwä uff zwä Meter,
un knapp e Vertelstinnche später
kam der arm gelähmte Mann
unne dann beim Jesus an.

Weil, sie hann ne abgesäält
un hoffen, der werd gleich gehäält.

De Jesus sagt: „Jetzt sin mol still,
weil ich mich konzentriere will!

Ich sieh grad, groß is euer Glaube.
Drum tu ich mer jetzt mol erlaube,
die Sünde vun dem arme Lahme
zu erlasse, in Gottes Name.
Un jetzt stei uff, 's is gar net schwer,
un laaf e bissje hi un her!“

Ehr wärn's net glaawe, 's hat geklappt,
der Mann steit uff, streckt sich un tappt
hi und her, springt in die Lüfte
wie Parrer Böß mit neuer Hüfte!

Wie froh is do der arme Mann,
dass er widder laafe kann.
Wie nei gebor marschier er los
Richtung Heimat – Friedhofstroß.

Tags drauf er seine Schritte lenkte
in die Haardt und die Behängte.
Enuff bis zum fünfeckisch Stää
geht's mit de reparierte Bää.

De Esel bleibt uff jede Fall
bis uf weiteres im Stall!

Die Leit, wo ne sieh'n durch die Landschaft laafe,
rennen zum Jesus und lassen sich daafe.

Das Wunder hääßt vun jetzt ab knapp
„es Mackebacher Tuning Up“.

Das war das Gleichnis vun dem Lahmen –
Amen

Wie jedes Johr an dere Stell
noch e Liedche dabber schnell

Melodie: **These boots are made for walking**

Johrelang do konnt ich nimmi laafe,
der bleede Esel hat mich so getreet.
Braucht mer deswe a kä Schuh zu kaafe.
Doch jetzt wääß ich widder wie das Laafe geht.

Ich braicht jetzt e Paar Sneakers,
die sinn so schää bequem,
Adidas oder Puma, ganz egal:
Ich laaf jetzt hääm!

Wer Gott vertraut, dem widerfährt nur Gutes.
Das sieht mer an dem arm gelähmte Mann.
Wer fescht im Glaube is und guten Mutes,
der immer uff e Wunder hoffe kann.

Dann muss mer net verzweifle,
egal was aa geschieht.
Wer glaabt und hofft,
werd in de Not gerettet, wie mer sieht!
Der werd gerettet, wie mer sieht!